

閩中荔支通譜

閩中荔支通譜卷六

晉安鄧慶宗道協輯

綏城吳師古啓信訂

明徐興公荔支譜五

賦類

荔支賦

漢 王逸

暖若朝雲之興森如橫天之葦湛若大厦之容
鬱如峻嶽之勢脩幹紛錯綠葉臻臻灼灼若朝
霞之映日離離如繁星之着天皮似丹罽膚若

明璫潤伴和璧奇
翰五黃仰嘆麗表
俯嘗佳味口含甘
液心受芳氣兼五
滋而無當主不知
百和之所出卓絕
類而無儔超衆果
而獨貴

荔支賦

唐 張九齡

南海郡出荔支焉
每至季夏其實乃
熟狀甚瓌詭味特
甘滋百果之中無
一可比余往在西
掖嘗盛稱之諸公
莫之知而固未之
信唯舍人彭城劉
侯弱年遷累經于
南海聞斯談倍復
喜歎以爲甘旨之
極也又謂龍眼凡
果而與荔支齊

名魏文帝方引蒲桃及龍眼相比是時二方不通傳聞之大謬也每相顧閒議欲爲賦述而世務卒卒此志莫就及理郡暇日追敘往心夫物以不知而輕味以無比而疑遠不可驗終然永屈况士有未效之用而身在無譽之間苟無深知與彼亦何以異也因道揚其實遂作此賦

果之美者厥有荔支雖受氣於震方實稟精於火離乃作酸於此裔爰負陽以從宜蒙休和之所播涉寒暑而匪虧下合圖以擢本傍蔭畝而

抱規紫紋紺理黛葉細枝蒼鬱而霏霏環合而
焚纏如蓋之張如帷之垂雲烟沃若孔翠于斯
靈根所盤不高不卑陋下澤之沮洳惡層崖之
嶮巖彼前志之或妄何側生之見疵爾其勾芒
在辰凱風入律肇允含滋芬敷謐溢綠穗靡靡
青英苾苾不豐其華但甘其實如有意乎敦本
故微文而妙質蒂葍房而攢萃皮龍鱗以駢櫛
膚玉英而含津色江萍以吐日朱苞剖明璫出
罔然數寸猶不可匹未玉齒而殆銷雖瓊漿而

可軼彼衆味之有五此甘滋之不一伊醇淑之
無準非精言之能悉聞者歎而缺企見者訝而
驚乞心恚可以蠲忿口爽可以忘疾且欲神於
醴露何止敷之湘橘援蒲桃之見擬亦古人之
深疾若乃華軒洞開嘉賓四會時當煥煜客或
煩憤而斯果在焉莫不心侈而體怵信雕盤之
仙液實玳筵之綺績有終食於累百愈益氣而
治內故無厭於所甘雖不貪而必愛沉美李而
莫取浮甘瓜而自退豈一座之所榮冠四時之

爲最夫其貴可以薦宗廟其珍可以羞王公亭
十里而莫致門九重今曷通山五嶠今白雲江
千里今青楓何斯美之獨遠嗟爾命之不工每
被誚於凡口罕獲知於貴躬柿何稱乎梁侯梨
何幸乎張公亦因人之所遇孰能辨乎其中哉

閩中荔支通譜卷七

晉安鄧慶宗道協輯

綏城吳師古啓信訂

明徐興公荔支譜六

詩類

咏荔支

齊 劉霽

叔師貴其珍、武仲稱斯美、良由自遠致、含滋不
留齒、

○ 解悶

唐 杜甫

先帝貴妃俱寂寞○荔支還復入長安○炎方每續
朱櫻獻○玉座應悲白露漙○

憶過瀘戎摘荔支○青楓隱映石逶迤○京華應見
無顏色○紅顆酸甜只自知○

側生野岸及江蒲○不熟丹宮滿玉壺○雲壑布衣
駘背死○勞生重馬翠眉須○

翠瓜碧李沈玉甃○赤梨葡萄寒露成○可憐先不
異枝蔓○此物娟娟長遠生○

華清宮

杜牧

長安回望繡成堆，山頂千門次第開。
一蹴紅塵
妃子笑，無人知是荔枝來。

題郡中荔枝詩十八韻兼寄萬州楊八使

君

白居易

奇果標南土，芳林對北堂。
素華春漠漠，丹實夏煌煌。
葉捧低垂戶，枝擎重壓牆。
始因風弄色，漸與日爭光。
夕訝條懸火，朝驚樹點妝。
深於紅踠躑，大校白檳榔。
星綴連心朵，珠排耀眼房。
紫羅裁襯殼，白玉裹填瓤。
早歲曾聞說，今朝始摘嘗。

嚼疑天上味，嗅異世間香。潤勝蓮生水，鮮逾橘
得霜。胭脂掌中顆，甘露舌頭漿。物少猶珍重，天
高苦渺茫。已教生暑月，又使阻遐方。淬液靈難
駐，妍姿嫩易傷。近南光景熱，向北道途長。不得
充王賦，無由寄帝鄉。唯君堪擲贈，面白似潘郎。
重寄荔支與楊使君，欲種植故有落句戲之。

摘來正帶凌晨露，寄去須憑下水船。映我綈衫
渾不見，對公銀印最相鮮。香連翠葉真堪畫，紅

透青籠實可憐、聞道萬州方欲種、愁君得喫是
何年。

種荔枝

紅顆珍珠誠可愛、白鬚太守亦何癡、十年結子
知誰在、自向庭前種荔枝。

荔枝樓對酒

荔枝新熟雞冠色、燒酒初開琥珀香、欲摘一枝
傾一盞、西樓無客共誰嘗。

荔枝

鄭谷

平昔誰相愛、驪山遇貴妃、在教生處遠、愁見摘
來稀、曉奪紅霞色、晴欺瘴日威、南荒何所戀、爲
爾卽忘歸、

荔支樹

二京曾見畫圖中、數本芳菲色不同、孤棹今來
巴徼外、一枝烟雨思無窮、夜郎城近含春瘴、杜
宇巢低起暝風、腸斷渝瀘霜霰薄、不教葉似灞
陵紅、

南海陪鄭司空遊荔園

曹松

荔支時節出旌旂、南國名園盡興遊、亂結羅紋
照襟袖、別含瓊露爽咽喉、葉中新火欺寒食、樹
上丹砂勝錦州、他日爲霖不將去、也須圖畫取
風流、

荔支

韓偓

遐方不許貢珍奇、密詔惟教進荔支、漢武碧桃
爭比得、枉令方朔號偷兒、

封開玉籠雞冠澁、葉襯金盤鶴頂鮮、想得佳人
惟露齒、翠釵先取一枝懸、

巧裁絳片裹神漿、崖蜜天然有異香、應是仙人
金掌露、待成冰、入茜羅囊、

荔支詩

薛能

類如松子色如櫻、未識蹉跎欲半生、歲杪監州
曾見樹、時新入座久聞名、

宣和殿荔支

宋 徽宗皇帝

密移造化出閩山、禁御新栽荔子丹、玉液乍凝
仙掌露、絳苞初結水晶丸、酒酣國豔非朱粉、風
泛天香轉蕙蘭、何必紅塵飛一騎、芬芳數本座

中看

○ 咏荔支

曾鞏

剖見隨珠醉眼開○丹砂緣手落塵埃○誰能有如黃犢摘盡繁星始下來○

玉潤冰清不受塵○仙衣裁出絳羅新○千門萬戶誰曾得○只有昭陽第一人○

絳縠囊收白露團○未曾封寄向長安○昭陽殿裏才聞得○道佳人不耐寒○

金釵雙捧玉纖纖○星宿光芒動寶奩○解笑詩人

誇博物祇知紅顆味酸甜

四月十一日初食荔支

蘇軾

南村諸楊北村盧。白花青葉冬不枯。垂黃綴紫
烟雨裏。特與荔支爲先驅。海山仙人絳羅襦。紅
紗中單白玉膚。不須更待妃子笑。風骨自是傾
城姝。不知天工有意無。遣此尤物生海隅。雲山
得伴松檜老。霜雪自困楂梨粗。先生洗盞酌桂
醕。冰盤薦此頰虬珠。似開江瑤斲玉柱。更洗河
豚烹腹腴。我生涉世本爲口。一官久已輕蓴鱸。

人間何者非夢幻、南來萬里真良圖、

食荔支

惠州太守東堂祠故相陳文惠公堂下有公
手植荔支一株郡人謂將軍樹今歲大熟嘗
啖之餘下逮吏卒其高不可致者縱猿取之
丞相祠堂下將軍大樹旁炎雲駢火實瑞露酌
天漿爛紫垂先熟高紅挂遠揚分甘徧鈴下也
到黑衣郎

食荔支

羅浮山下四時春、盧橘楊梅次第新、日啖荔枝
三百顆、不妨長作嶺南人。

次韻劉燾撫句蜜漬荔枝

時新滿座聞名字、別久何人寄色香、葉似楊梅
蒸霧雨、花如盧橘傲風霜、每憐蓴菜下鹽豉、肯
與葡萄壓酒漿、回首驚塵捲飛雪、詩情真合與
君嘗、

次韻曾仲錫承議食蜜漬生荔枝

代北寒螿擣韭萍、奇苞零落似晨星、逢鹽久已

成枯腊、得蜜猶應是薄刑、欲就左慈求拄杖、便
隨李白踏滄溟、攀條與立新名字、兒女稱呼恐
不經、時有十八娘荔支

再和曾仲錫荔支

柳花着水萬浮萍、荔實周天兩歲星、本自玉肌
非鵠浴、至今丹殼似星刑、侍郎賦咏窮三峽、妃
子烟塵動四溟、莫遣詩人說功過、且隨香草附
騷經

荔支嘆

十里一置飛塵灰○五里一堠兵火催○顛坑赴谷
相枕藉○知是荔支龍眼來○飛車跨山鵲橫海風
枝露葉如新採○宮中美人一破顏○驚塵濺血流
千載○永元荔支來交州○天寶歲貢取之涪○至今
欲食林甫肉○無人舉酒酹伯旂○我願天公憐赤
子○莫生尤物爲瘡痂○雨潤風調百穀登○民不饑
寒爲上瑞○君不見武夷溪邊粟粒牙○前丁後蔡
相籠加○爭新買寵各出意○年年闕品充官茶○吾
君所乏豈此物○致養口體何陋邪○洛陽相君忠

孝家可憐亦進姚黃花

荔支

劉攽

南州積炎德、嘉樹凌冬綠、薰風海上來、丹荔迎
夏熟、煌煌錦繡林、亭亭翡翠屋、鵠頭爛晨霞、天
酒瑩寒玉、流聲感華夏、採綴如不足、開元百馬
死、漢堠五里促、君王玉食間、此薦知不辱、追今
糟粕餘、猶足驚凡目、憶初成上林、四方會奇木、
使臣得安榴、天馬來苜蓿、擢身自幽遐、托地幸
滲漉、我欲咎真宰、喟茲限荒服、將非名實雄百

果爲羞縮區區化工意聊爾存衆族

○ 荔支

荔筵火齊滿金盤五月甘漿破齒寒南國已隨
朱夏熟北人猶指畫圖看烟嵐不續丹櫻獻玉
座空悲羯鼓殘相見任誇雙蒂美多情莫唱水
晶丸

荔支詩

劉子翬

挺秀窮荒嘆未遭昔賢迎賞著風騷縱班盧橘
才非偶不近長安價愈高烟雨萬株遙若畫塵

埃一騎咲徒勞。瑠盤此日無遺選。品格妍媸敢
自逃。

炎蒸午夢枕滄浪。落落星苞喜乍嘗。筆下丹青
千品色。釵頭風露一枝涼。雞冠借喻何輕詆。馬
乳爭名固不量。真得當時妃子咲。驪山千古事
淒涼。

荔支六言

曾幾

蕉子定成曾伍。梅丸應愧盧前。金谷危樓魂斷
白州舊井名傳。

紅皺解羅襦處清香開玉肌時繡嶺堪憐妃子
亭蘿不數西施

咏荔支

異方風物鬢成斑荔子嘗新得破顏蘭蕙香浮
襟解後雪米膚在酒酣閒絕知高韻輕瑤柱未
覺豐肌病玉環似是看來終不近寄聲龍目儘
追攀

福帥張淵道荔支

豈無重碧實瓶罍難得輕紅薦一杯千里人從

閩嶺出三年公送荔枝來。玉爲肌骨涼無汗。霞作衣裳皺不開。莫訝關情向尤物。厭看綠李與黃梅。

謝趙吉守餉生荔枝

楊萬里

吾州五馬住閩山。分我三山荔子丹。甘露落來雞子大。曉風凍作水晶團。西川紅錦無比色。南海綠羅猶帶酸。不是今年天下暑。玉膚照得野人寒。

○荔枝歌

陳去非

炎精孕秀多靈植。荔子佳名聞自昔。絳囊剖雪
出瑀盤。尋常百果無顏色。閏天六月雨初晴。星
火熒煌耀川澤。欸如彩鳳戲翱翔。爛若彤雲堆
翕赫。中郎裁品三十二。陳紫方紅冠儔匹。鹽蒸
蜜漬尚絕倫。琢瓊空羨南飛翼。我聞至和全盛
時。貢輸不減開元日。涪州距雍已云遠。況此奔
馳來海側。繡衣使者動轡車。黃紙封林遍千陌。
浮航走轍空四郊。妙品人間無復得。似聞供給
只纖毫。往往盡入公侯宅。驪山廢苑狐兔靜。良

嶽新宮鼓鼙急○繁華今古共淒涼○遶樹行吟悲
野客○西風刮地戰塵昏○一聽胡笳雙淚滴○

荔支

浪淘沙

歐陽脩

五嶺麥秋殘○荔子初丹○絳紗囊裏水晶丸○可惜
天教生處遠○不近長安○往事憶開元○妃子偏
憐○一從魂散馬嵬關○只有紅塵無驛使○滿眼驪
山○

○

荔支

浪淘沙

黃庭堅

憶昔謫巴蠻○荔子親攀○冰肌照映柘枝冠○日擘

輕紅三百顆、一味甘寒。重入鬼門關也似人。
間一雙和蝶、插雲鬟。賴得清湘燕玉面、同倚欄。
干。

又阮郎歸

晚歲鹽州聞荔支、赤英垂墜壓欄枝。萬里來逢
芳意歇、愁絕滿盤空。憶去年時、澗草山花光
照座。春過等閒枯李。又纍纍、辜負寒泉浸紅皺。
銷瘦。有人花病損香肌。

准擬堦前摘荔支、今年歇盡去年枝。莫是春光

厮料理無比、譬如痠瘡有休時、碧輦朱欄情
不淺、何晚來年枝上報、纍纍雨後園林坐清影、
蘇醒紅裳剝盡看香肌、

靜暉樓前有荔子一株木老矣猶未生子
去其枯枝今歲遂生一二百顆至六月方
熟以下在夔州作王十朋

木老生遲六月丹明珠百顆照朱顏因渠風味
思瑤柱撩我鄉心念玉環路遠應難三日寄中

荔支三日
到永嘉

樓高更上一層攀君謨譜內丁香種

荔支通譜

卷七

三

宜在江陳品第間

周潛行可和詩再用前韻

肌膚冰雪鶴頭丹、三峽相逢一破顏、人折高枝

如折桂、鳥啣餘顆似啣環、香傳樂譜名尤重、曲名

荔支紅人詩家句莫攀、杜輕紅來歲熟時先寄

我、夢魂應到白雲間、

行可再和因思前日與韶美同飲計臺臨

池摘實復用前韻二首

星火燒空一夜丹、來禽青李覺無顏、少陵池館

三人賞

世傳計臺乃少陵舊宅

白帝江山四面環生晚免

教妃子汗食餘應許黑衣攀閩娘十八誰標榜
未必風流似此間

神仙乞與返魂丹枯木能成處子顏雅樂聲中
逢魏絳重圍解後見齊環九齡賦妙那能繼三
峽詩高未易攀兒輩莫言訓倡晚吾鄉食實在
秋間

食荔支

荔支初熟釘金盤手擘輕紅子細看風味由來

太奇絕不教容易到長安

妃子園中荔子奇莫因名號起猜疑清時入坐
非尤物一洗烟塵賴好詩

詩史堂前種幾時輕紅曾入少陵詩殊方競續
櫻桃獻萬樹爭先爾獨遲

拾荔支核欲種之戲成

海味正思瑤柱美夔門又見荔支紅炎方入貢
自妃子郡圃欲栽如白公官滿猶爲十年計實
成須待二星終不須更論何時喫前種後收人

我同

○ 詩史堂荔支歌

君不見詩人以來一子美○莫年流落來夔子賦
詩三百六十篇○西瀼東屯客愁裏○何人作堂畫
遺像○收拾光芒榜詩史○堂前何有有荔支○樹猶
未老熟獨遲○世人貴早不貴晚○倘非我輩誰賞
之○涪陵昔遭妃子汗○萬顆包羞莫能訴○瀘戎一
經少陵擘○至今傳誦輕紅句○少陵傷時淚成血○
一點丹心不磨滅○散成朱實滿炎方○風味如詩

兩奇絕。樂天曾畫忠州圖。自言香味人間無。君謨亦作閩中譜。陳紫聲名重南土。何如詩史堂前株。正是一飯孤忠餘。人爲世重物亦重。端如丈人屋上烏。巴圖閩譜合避路。奚用品第紛錙銖。撓先熟者如楊盧。但可與之作前驅。閩娘十八婢妾爾。將軍大樹真慵奴。我生四百餘年後。來作先生游處守。登堂三嘆荔正丹。聊效柳人祠子厚。安得先生今復生。添賦夔州歌一首。要使荔支之名長不朽。

○ 詩史堂荔支晚熟而佳預同官共賞偶成
參差摘實分餉復用前韻

詩史堂前荔支晚尤美○高壓瀘戎與妃子○姓名
猶未聞峽中風味惟應似皮裏○試將遠況江瑤
柱○正似騷人擬良史○我來嘆息願屢支○殊方爭
獻唯恐遲○汝今已晚何用好○不是少陵誰眼之○
貴妃游魂遭血汚○玉座悲懷何以訴○唯有雲安
再拜人○問解夔州兩絕句○遺像空存食不血滿
目○烟霞明自滅○何人種此星幾終○一樹團團味

奇絕君不見南賓木蓮有華何足圖樂天過慮
重看無又不見洛陽牡丹妖艷何必譜六一區
區記風土天生此果更此株夏日之時見子餘
晝疑炎方張火傘夕訝庭樹棲赤鳥雙頭瑩若
玉一鼓細骨輕於錢五銖陳江閩閩如崔盧茲
產於閩必爭驅大無中邊甜勝蜜醞釀不假蜂
爲奴永安宮西郡堂後折簡呼賓老太守時方
炎熱會苦稀事好乖違意徒厚手摘高枝贈丹
實歌和前篇搔白首嗟一餉之樂今天亦慳於

老朽

病中食火山荔支

以下在泉州作

前年夔州食荔支、同僚共賦輕紅詩、妃子名園
世所貴、不似詩史堂前奇、去冬分符向南土、半
月身行荔支圃、三州嘉木皆眼見、更閱君謨向
來譏臨漳一種名火山品、雖云下熟則先從今
漸入荔佳境、陳江未譬先流涎、老病餘生怯佳
果、日啗那能三百顆、殷勤未破絳紗囊、心火驚
添火山火、

○再用前韻

屏間觀畫願頻支。想像風味哦新詩。火山太早
反遭罵。陳紫未顯誰稱奇。氣稟南方君子土。不
近長安帝王圃。安排名字知何人。誤與牡丹同
入譜。泉南老守思故山。荔熟我去誰後先。但願
丁香一株熟。添入藥裏痊痰涎。平生夢寐南州
果。瘦腹如蟬消幾顆。明年何處飮杯盤。雁宕山
前月流火。

漳州石教授寄火山荔枝

炎方摘實是筠籠，千顆遙遙寄病翁。
未啗吾州法石白，且嘗鄰郡火山紅。
纔先趁得楊盧雨，珍重來從芹藻宮。
我欲細論香色味，一尊何日廣文同。

林漕世傳贈莆中荔子名狀元紅分送陸
倅陸有詩次韻

譜中不見見屏中，正與花王雅目同。
別駕破荒吟好句，少陵詩裏擘輕紅。

提舶送荔支

舶臺丹荔新秋熟、風味如人自不同、名字未諳
真缺典、從今呼作馬家紅、舊已有馬家綠者

陳紫

端明品第首推陳、花裏姚黃是等倫、郡圃一株
稱小紫、故家風味自宜珍、

皺玉

莆中皺玉價傾城、品第吾何敢妄評、只恐此非
真皺玉、果然是玉亦虛名、

大將軍

荔枝名字太紛紛、所見多應不逮聞、別有深紅
霸羣品、郡人呼作大將軍、

玉堂紅

天教尤物產閩中、名字深奇自不同、顧我素稱
田舍子、如何敢啗玉堂紅、

奪先紅

閩中荔子說莆中、闕下奇包又不同、正向鈴齋
想風味、奪先人送奪先紅、

七夕紅

宅堂荔子無名字自我呼爲七夕紅記得去冬
初到日家人指樹語衰翁

白蜜

紛紛蜂采百花歸蜜在枝頭竟不知造物要令
甜在後時人莫訝熟何遲

次傳景仁馬家綠荔支六首

玉座奇苞未與頒伏波家果忽堆盤宜書蔡譜
均稱綠不比韓詩只咏丹薦李徒誇碧實脆嚼
瓜未覺水晶寒美君衫鬢巧相似我坐郡廳慚

素餐、泉州廳事號荔支廳

兩載閩南白盡頒、驚看異品上杯盤、發緘初訝
囊非絳、擘實猶疑顆未丹、較美宜同法石白、纔
先欲占麥秋寒、廣文詩句篇篇好、咀嚼令人欲
廢餐。

荔子新詩屢見頒、端同玉局賦金盤、香包盡帶
賜袍綠、熟顆半含仙竈丹、西蜀稍多應喜遠、東
嘉可種似宜寒、微酸好入鹽梅鼎、莫作尋常衆
果餐。

蔡譜黃詩久已頒、不同馬乳綠堆盤、色因不惡
故名酒、食可成仙、何用丹、追逐故紅相上下、比
方魁紫稍孤寒、殷勤百顆分甘意、端爲詩情合
得餐

涪陵妃子謾名園、豈似閩南綠一盤、最喜色同
青玉案、不妨功並紫金丹、畫看紅紫品流俗、詩
嚼冰霜牙頰寒、吟罷閑觀右軍帖、來禽青李可
同餐

平生雅意在丘園、行矣歸尋隱者盤、此日詩盟

共君結明年荔子爲誰丹。欲移仙種栽中土，只恐天資不耐寒。定向家鄉想風味，江瑤斫柱謾加餐。

玉泉院荔支軒

楊 肱

曾觀荔支圖。幾費丹青妝。能紅能紫亦能綠。不能寫作天然香。曾讀荔支譜。品品堪第一。較量滋味論高低。大抵聞名不聞實。我疑真宰推化工。安排百果分番紅。杏梅桃李不足數。先教碌碌隨春風。錦囊玉液相渾淪。百果讓作東南元。

別有真香與色味、一時分付荔支軒、

荔支行寄王善父

元 吳 淦

炎雲六月光陸離、人在閩南餐荔支、荔支日餐
三百顆、紅綠亞林欺衆果、絳羅繫樹蠟封帶、尚
食擎盤獻青瑣、涪州歲貢與此同意、欲移根來
漢宮、天生尤物不用世、沾洒蛋雨吹蠻風、蠻風
蛋雨振林藪、西域蒲萄秋壓酒、勸君莫近楊太
真、傳說驪山塵汙人、

畫荔支障

張思廉

知味何人似蔡襄、方紅陳紫與誰嘗、七閩塵障
南來使、腸斷薰風十八娘、

咏晉安荔支詩

明 沐 璘

建水夫何如、厥土早而熱、蠻花開佛桑、候禽罷
鵲鳩、莽雲覆溟濛、梅雨滋露霖、接地茂細枝、遮
空舒黛葉、翠葆霞焜煌、錦幄風掀揭、香麝忌經
過、飛鷗防盜竊、勁雛赤膚脫、肥火計切瓊瓢凹、
明璫怪可餐、冰丸訝許啗、真珠堆綠雲、玳瑁垂
綵纈、鳳爪天下奇、龍牙衆中傑、飽食慙素餐、長

吟望林樾

咏荔支

洪遂初

五月閩南荔子丹、摘來宜薦水晶盤、色欺鶴頂
霞新染、光奪龍精露未乾、曾得漢皇陪上苑、又
隨星騎貢長安、紫薇垣裏分嘗處、頓覺瓊漿溢
齒寒、

饋林少保火山荔支

黃輦

側生幽谷半摧殘、煙雨平林五月寒、嘆息不逢
高着眼、只緣風味帶微酸、

鳳岡荔錦

吳源

鳳岡荔子最稱嘉。冬月林間已結華。雨潤紫苞含玉液。日烘錦殼燦紅霞。舌頭甘露真堪美。掌上胭脂更可誇。昭代祇今徵貢絕。笑他猶種邵平瓜。

鳳岡荔錦

陳叔紹

鳳岡一帶樹離離。暑雨晴初顆顆垂。影落滄波疑濯錦。色烘白晝似凝脂。清時不動塵千里。夏日高懸火滿枝。最喜華筵賓客滿。冰盤香薦侑

瓊卮

荔支山鳥

羅周

雨過蠻溪歛瘴烟，猩紅萬顆壓枝鮮。
誰知山鳥偷嘶去，又是紅塵一騎前。

姚鳳岡送荔支荅謝

楊慎

栢府薰風荔子丹，雕盤持贈下臺端。
絳紗囊裏冰肌滑，火齊枝頭水玉寒。
羅帕分珍慚逐客，驛塵飛騎憶長安。
瓊瑤欲報才應盡，獨立蒼茫倚曲欄。

白茅顧氏種荔枝成樹有感 沈周

人傳顧家園近有閩荔枝始聞漫竦企果否兩
莫裁閩吳地殊懸此物胡來哉彼此氣各偏炎
寒亦難諧淮南不宜橘冀北不宜梅物固產不
通性與土相乖耳目自爲仇于懷日徘徊問訊
昨走奴已遣仍慮詒及返有所挾么枝葉蓂蓂
葉次綴小蕾含黃未成開事固有變理執常哂
吳猷兼能述所致妄瘞核偶莖今本已拱把森
然暢條枚去歲實垂成墮落惜瑰玫根氣恐未

充、加培如保孩、紫苞已在眼、香甘早流腮、老夫
喟有此、南氣其北來、先從草木見、造化有胚胎、
厥初限荒服、難與玉食偕、漸虞道理近、有以滋
味媒、置堠當未免、又見飛塵灰、

○ 新荔篇

文徵明

常熟顧氏自閩中移荔支數本、經歲遂活、石
田使折枝驗之、翠葉芴芴然、不敢信也、以示
閩人、良是因作新荔篇、命璧同賦、

錦苞紫膜白雪膚、海南生荔天下無、鹽蒸蜜漬

失真性平生所見唯萎枯相傳尤物不離土畏
冷那得來三吳顧家傳來三四株桂身翠幄森
森殊遠人無憑未敢信持問閩士咸驚呼還聞
纍纍生數子絳綃裹玉分明是未論香色果如
何只說形模已珍美千載空流北客涎一朝忽
落饒夫齒白圖蔡譜漫誇張文飾寧如親目覩
飽啖只於鄉里足鮮嘗漸去京師邇不須更作
嶺南人只恐又無天下瘴朝來自訝還自疑事
出非常有如此雖云遠附商船達不謂滋培遂

生活始知生物無近遠故應好事能回轉
聊占地氣遷造化竟爲人事奪仙人本是海山
姿從此江鄉亦萌蘖由來沃衍說吾鄉異品珍
嘗曾不吝不緣此物便增重無乃人心貴希闕
福山楊梅洞庭柑佳名久已擅東南風情氣味
不相下稱絕今兼荔子三

咏荔支

陳 炲

蒙泉岳先生嘗評荔支謂北土葡萄足以當
之若比玉消香水自可北面土人護短如此

余今復爲此說解嘲豈真護短者耶

水晶光瑩罩丹綃風味寧甘讓玉消寄語土人
休護短東坡先已有詩譏

饋高宗呂鳳池超荔支

林 姿

本非凡品類超出鳳池羣自恨所居僻遠在瘴
海濱至性耐煩熱丘園絕垢氛中含冰雪姿外
纈紅錦文雨沾日以滋林高爛紫雲龍牙尚莫
敵蚶殼徒紛紜禽鳥不敢啄晨夕候之勤起盼
草亭前日日來南薰故人邈難見愁思劇如焚

縱有一尊酒、獨酌未成醺。新摘不滿筐、持贈將微芹。封之吟不就、無奈正思君。

荔支

馬森

不逐青陽艷、偏妍朱夏時。摘來紅瑪瑙、擘破白琉璃。

謝邵都閩惠荔支

王世貞

朝來逢驛騎、香色滿雙函。野老慙推食、將軍爲絕甘。瓢看澄露瀉、枝憶紫雲酣。寂寞華清在、何人走劍南。

荔支篇

黃謙

江南五月海氣熱○南國荔子垂堪折○裊裊溪風
散麝香○冥冥山雨流猩血○飛樓清簾留衆賓○屠
羊貰酒酬芳辰○黃頭奴摘登君席○四座果核難
爲鄰○朱櫻非貴○馬乳非珍○頓令玉涎生口角○何
怪驛騎飛紅塵○紅塵赤日驪山路○天梯石棧年
年度○但博玉環嬌勝花○寧問丁夫汗如注○鸞旂
西指愁遠天○斷腸回首各風烟○馬鬼新魂忽寂
滅○涪州舊樹空駢鮮○君不見汴州艮嶽花石綱○

朝爲遊苑幕淒涼

荔支四首

郭子章

榕樹環山郭、離支列省衙、妍姿當六月、神品壓
三巴、露炫金莖爛、日融火齊斜、誰評紅與綠、猶
自說江家

凌冬還釀秀、盛夏轉芳菲、豔吐千家色、熟看百
鳥肥、珠房朝采郁、錦殼晚霞輝、惟植炎荒遠、徒
勞笑貴妃

鮮疑排鶴頂、燦若謝雞冠、詎謂薇垣紫、翻羅荔

千丹低垂裝翠幌、錯落襯金盤、瓊漿堪入口、頗
令頰齒寒、

雨後光逾碧、風中韻自玄、着陰無隙地、飛焰欲
橫天、香沁琴書潤、味爭醴酪妍、忠州圖畫在、靈
美詎能傳、

荔支八首

車大任

垂垂一樹亞朱闌、萬顆明珠似渥丹、長樂自來
誇勝畫、直教人作畫圖看、

閩中五月荔支熟、烘日蒸霞緋錦簇、別有一株

接葉青居人道是江家綠

碧玉林中影絳娥臨風不覺醉顏酡西川南海
空相妬色味無多奈爾何

秀色誰云若可餐餘香沁齒水晶寒等閒消盡
人間渴不減金莖玉露盤

滿盤堆食盡還添薄宦三年迹未淹便欲移家
炎海上兒童贏得耐甘甜

嘗新處處憶高堂況是閩南荔子香水遠山長
懷不徼令人還笑洞庭霜

紫瓊黃玉品非常、延壽何如百步香、一騎長安
飛不到、太真遺恨未曾嘗、

綠柚黃柑總不如、蒲萄盧橘亦躊躇、而今天子
卻方物、何用唐羌更上書、

荔支四首

溫景明

栗玉星毬萬樹紅、側生曾獻大明宮、已知蜀道
艱難甚、不在胡笳羯鼓中、

江干澤畔淨芳塵、綠核纍纍萬顆勻、閩嶠十年
誰作客、馨香猶得入吾脣、

肌可怡顏葉可裳江南果實足稱王誰能醞釀
瓊漿裏不羨瑤池玉液香

四月五月產火山粵中兒童不肯攀更有甘甜
如進奉最憐埋沒在人間

荔支紀興二十六首

屠本峻

予在晉安喜啖荔支日可二百餘顆居民因
有貽者遂得厭飽隨意紀興作七言絕句胎
之騷壇執牛耳者萬曆丁酉六月書

其一

火山 松栢壘

五月閩天丹荔垂，雨餘林日照離離。
火山松壘元先熟，萬顆新嘗玉滿匙。

其二 淨江瓶

雲張翠幄子檣星，側出枝間曉露零。
城裏萬家相問遺，筠籠爭買淨江瓶。

其三 中觀

瓊瓢甘露法門開，湛目青蓮大士來。
帝網琉璃相映澈，天台中觀放叅回。

其四 栗玉

弱歲曾嘗荔子丹、一池香水濯冰丸、如今正是
朱明日、栗玉先堆瑪瑙盤、

其五

星毬 金鍾

鵲卵 桂林

鑲玉 勝畫

星毬鵲卵大於拳、鑲玉金鍾品是仙、別有桂林
將勝畫、小姬一見一嫣然、

其六

蜜丸

牛膽

蜜丸牛膽兩豐腴、碧玉爲神顙顙殊、兒女不知
瓢可啖、錯疑耳後大秦珠、

其七

黃香

自汲清泉洗荔支、吳娃如意劈胭脂、水晶簾下
黃香熟、錯落瑤光並玉肌、

其八 結綠

結綠如榛小更幽、齒牙蕭爽恣冥搜、怪來肌骨
清涼甚、六月如從華頂遊、

其九 龍牙 雙髻

幻出龍牙變態奇、晚涼雙髻侍兒持、自是拜來
新月早、非關剖出夜光遲、

其十 天柱 洞中紅

天柱高凌月窟孤洞中紅艷裊珊瑚飽食內熱
渾忘卻已貯冰心在玉壺

其十一

鳳池超

尚幹鄉中錦作堆鳳池超出越王臺相如渴病
今應解不用金莖露一杯

其十二

綠羅袍

絳囊公子綠羅嬌白水真人絳節朝欲向九仙
通尺一倘能雲際坐相邀

其十三

黑紫

江綠

剖來丹荔滿盛甌，露吸霞餐得自由。寄語秉鈞
諸貴道，波臣今已似通侯。

其二十六

自起開籠揀荔魁，半將白曬半烘焙。故鄉朋舊
應嘲我，不遣紅塵一騎回。

咏荔支

曹子念

天孫戲剪絳羅機，散入千林海日暉。漢苑漫誇
盧橘甚，唐宮應笑驛塵飛。芙蓉露釀初消渴，閨
闔香生舊賜緋。手劈紅雲歌白雪，人間樂似使

君稀

荔枝

顧大典

休言閩海是炎鄉，山氣常含雨氣涼。
最愛榕城饒好景，錦雲十里荔枝香。

宮詞

王未承

閩州荔子玉玲瓏，五月西來萬里紅。
笑取一枝連理顆，繡綈封入合歡宮。

荔枝名歌八首

謝杰

狀元紅

紫金香貯玉玲瓏，點綴薰風上綠叢。一種丹徒三百品，路人先看狀元紅。

勝畫

仙姬月下輦靈丹，乳竇香凝白雪寒。倦入絳帷知睡去，嬌姿絕勝畫中看。

中觀

一串摩尼湛錦波，玉衣童子曳緋羅。炎光高護空中觀，添作祇園勝果多。

金鍾

白水真人鍊絳砂、金鍾鑄就落誰家、定應飛入
梨園去、催出枝頭萬點霞、

滿林香

素娥嬌弄淡紅妝、半幅霞綃罩海棠、夜合口脂
勻玉露、曉風吹度滿林香、

山支

秋園涼雨洗林空、更向青山枝上紅、小結丁香
隨錦隊、櫻桃擎出大明宮、

蜜丸

赤虬山人蜂作房
柘衣輕惹蜜丸香
波羅小甕
黃金色長貯仙厨
白玉漿

鵲卵

紫姑秋夜臨高臺
瀉下金莖露一杯
牛渚橋邊
遺鵲卵靈官拾作寶珠迴

○ 憶荔支

江鄉六月火雲飛
萬顆纍纍落翠微
甘露夜浮
頰玉瓊流霞朝染紫羅衣
妝成帝女脂猶濕浴
罷楊妃乳正肥
爲報相如消渴甚
金莖留待茂

陵歸

啖荔支

閑齡

避暑風軒下、金盤劈荔支、可憐分寵日、至是渥
丹時、香褪紅衣膩、膚凝碧玉脂、朱顏難自固、中
赤向君披、

咏荔支

柳應芳

白玉明肌隱絳囊、中含仙液壓瓊漿、城南多少
青絲籠、競取王家十八娘、

曾侍驪山清燕來、六宮爭作水精猜、玉環一去

無人問空對涪江泣馬嵬。

荔支曲

鄧原岳

鳳凰山下荔支園、擇日開林市子喧、一百銅錢
分一擔、平明奔進合沙門。

纔交小暑日頻催、一夜驚看錦繡堆、早起香風
遍城郭、人人都道荔支來。

紅如鶴頂大如杯、奪取頭籌滿擔回、更怕午前
日色惡、齊將青葉蓋頭來。

火山先出試嘗新、只好山隈及水濱、酸沁齒牙

形味劣果中呼作掃除人

荔支高樹倒垂簷十尺長竿兩刃尖摘下巴憑
多少喫飽來還有水晶鹽

梢頭狐鼠捷如風夜鷺經過樹樹空高結茅寮
敲竹夾曉來添得照山紅

麻繩高吊小筠籠上下盤旋西復東且喜今年
風雨少荔支箇箇不生蟲

千株傍水各成行半是豪家郭外莊最好五更
乘露摘噉時猶帶露華香

玻璃盤貯水晶丸，疑是仙人絳雪丹。飽食日須三百顆，石林無暑夏堂寒。

金盃漱滌碧波妍，一道霞光照眼鮮。何似婕妤初賜浴，玉肌三尺浸寒泉。

綠袖紅綃錦隊齊，豐肌甘液壓枝低。吳兒可是多輕薄，錯把楊梅共品題。

萬樹搖風點翠苔，不妨對客日千枚。城中諸品垂垂盡，猶有吳航勝畫來。

海中仙品果中王，喜說多情十八娘。月日不知

誰第一、看來畢竟狀元香。

千秋摘盡荔枝殘、蜜漬鹽醃更曬乾、不分側生能損價、可知輸却玉漿寒。

荔枝

陳仲濤

果中稱異品、色味世間無、遇夏香尤盛、經冬葉不枯、楊梅真作僕、龍眼合爲奴、昔日宣和殿、移根植幾株。

繁繁蒸雨熟、顆顆向陽酣、錦殼殊慙色、清香蜜讓甘、防偷插夾竹、分摘貯鉤籃、此地無名種、猶

堪勝嶺南

咏荔枝

陳邦注

郭外行來數里村、纍垂千樹荔陰繁、晝晴陣陣
香風起、爭向林間說狀元、

紅粉佳人淺淡妝、樓頭時對鳳凰岡、試從今日
論顏色、傾國何如十八娘、

名園果熟擅江家、細骨香肌護絳紗、自是炎方
徵異品、上林盧橘漫相誇、

紅翠參差列畫圖、品題曾屬蔡君謨、客來携酒

林中賞折取丁香第一枝

荔支四咏

陳价夫

千紅萬紫轉歲華
絳李朱櫻敢並奇
繡嶺宮中含笑日
承恩不獨爲冰肌

右色

一騎紅塵驛路長
微風忽自送都梁
若教譜入清平調
姚魏安從擅國香

右香

剖却紅香列蚌珠
薦來玉液與醍醐
解醒不用花間露
擬物何須塞上酥

右味

嚴霜朔雪竟難成
瘴雨炎風始獨生
只爲能除

消渴病唐家應不置金莖

右性

荔支十咏

有引

陳薦夫

興公譜旣成、又賦荔品四十絕、新意雋調、情事韻語、割截都盡、余因賦所未賦者、題僻語、儉劣得十首、旣愧勝畫之晚成、又非火山之早熟、甘飫無煩於貴主、抱泣徒憐於村姬、客有謂余、複用天寶遺事者、余笑而未與之言。

駝蹄

朱實西來驛路長、明駝騎蹴滿蹄霜、當時也合

馳千里不獨涪州馬足忙

山中冠

衫爭暈綠帔爭紅散盡春風滿六宮自咲朱顏
生較晚只應隨分冠山中

金線

細骨香肌寵幸深華清泉裏玉沉沉絳綃朱袖
雖零落一縷難銷舊釧金

西紫

千株萬樹錦成堆獨自西家衣紫回寄語東君

休用妬紅塵元是蜀中來

○綠核

搖曳微風火滿林、驪山一顧主恩深、
胷中已化

萋弘血莫訝香肌少赤心

、皺玉

羽騎參差出驛門、空持朱實弔香魂、
阿環墜地

今千載猶有斑斑玉上痕

、一品紅

千里瀘戎驛騎飛、出山猶着薜蘿衣、
傳呼野服

休朝見、敕賜宮中第一緋。

玳瑁紅

顆顆明珠貢嶺南，還將玳瑁匣輕函。助嬌試插桃花髻，不數平原上客簪。

洞中紅

洞中丹實幾千年，愁向長安一騎傳。好似紅妝離洞去，桃花溪口戀塵緣。

勝江萍

佳名久已動明皇，浪迹誰能逐楚王。赤比朝陽

甘比蜜、令人北面是濃香、

咏荔支

徐 燾

夏日山居、荔支正熟、偶憶歐陽永叔浪淘沙
詞、風韻佳絕、遂按調効顰、歌以佐酒、本欲爲
十八娘傳神、反不堪六一公作僕矣、

高樹錦蒸霞、朱實青華、一丸寒玉裹紅紗、萬顆
纍纍、閩海上、不數三巴、西域枉乘槎、馬乳休
誇、剖開瓊液、碎丹砂、異品卽今誰第一、猶說江
家、

丹實滿林、葩耀日紅酣、由來佳品壓江南、漢苑
楊梅應避色、盧橘香慙、沁齒有餘甘、玉液中
涵釵頭一朶、美人簪、記得樂天曾有句、映我緋
衫、

樹樹火連空、綠葉芾芾、朱顏妖麗、玉肌豐傳說
瑯琊王少女、十八娘紅、分摘滿筠籠、錦繡成
叢、半林香氣度微風、却笑杜陵詩句好、只憶瀘
戎、

驛騎走紅塵、一笑華清、炎方何用獻朱櫻、天寶

梨園新度曲。小部音聲。鼙鼓動西京。妃子心
驚。梨花魂斷不勝情。翠袖紅綰俱是夢。水綠山
青。

十里錦雲鄉。傅粉凝妝。紅裙爭看綠衣郎。黑葉
稍頭朱柿小。玳瑁丁香。延壽品非常。尤勝陳
江繡鞋一種記。閩娘風送瑞堂香。百步結綠疏
黃。

一品狀元紅。金線金鍾。麝囊吹散桂林風。黃玉
紫瓊真勝畫。江綠叢叢。雙髻翠雲鬆。蘭膏香

濃綠珠魂在玉堂東五嶺三巴無此種獨擅閩
中

白玉瑩肌膚輕襯羅襦鳳凰岡上錦千株任是
崇龜工墨妙香味難圖百果更誰如羞殺楊
盧品題猶說蔡君謨渴延年還補髓一確醒
酬

庭靜午風涼荔子盈筐小姬纖手解羅囊玉腕
冰肌相掩映百步聞香含笑開檀郎何似濃
妝紅顏薄命總堪傷因憶驪山當日事閒說明

集

余少從先人客燕別荔支者八載歸適及時啖之不覺致飽偶成八絕 袁敬烈

星九錯落水晶盤雪比冰肌霞讓丹作客帝鄉逾八載不聞一騎向長安

六月南州暑不侵琉璃漿玉液解煩襟纍纍朱實千林綺不數枇杷萬顆金

堆成錦繡艷紅妝窈窕城東十八娘此物閩中推第一西川南海盡無香

冰盤輕解紫綃衣，一片香膚白玉肥。何似驪山新度曲，長生殿裏醉楊妃。

鳳爪龍牙盡可餐，朱香陳紫姓名繁。由來品類元非一，不比忠、川畫裏看。

樹下婆娑任意嘗，芳香沁入齒牙涼。醍醐未必能勝此，此物還教進尚方。

鳳岡天柱古來無，葉亂層雲樹半枯。歲歲熟時難採摘，任啣山鳥飽饑腸。

曾逐嬌妃一笑來，至今猶說驛塵灰。輕紅擘盡

朱顏謝何似當年葬馬嵬

田園雜興

鄧原岳

紅綠參差露氣鮮
荔支今歲正當年
山居清福堪消受
飽食還教樹下眠

颯颯西風雲欲崩
荒郊朔氣太憑陵
呼童速緼荔支火
此物由來不耐冰

賦得雨中丹荔

張邦侗

輕紅艷艷復團團
側出枝頭絳雪寒
雨潤胭脂香不斷
光沉琥珀露初溥
浣花人去淋漓後
擲

果車迴莽蕩間、姦女鼎中丹幾轉、飛瓊月下步
珊珊

荔支

彭城

金盤托出紫羅囊、瑤席誰誇馬乳香、自是紅顏
多命薄、一時恩盡棄君傍

閩中荔支通譜卷七